

Dielangana dia Meji pa Lumu Luimpe lua Yone

No. 32

Kujika ne Dibika dia Mukelenge Yesu

Badi bajika Yesu

Pakajika malu aa, Yosefe wa ku Alimataya, wakadi muyidi wa Yesu mu musokoko bualu bua wakadi utshina Bena Yuda, wakalomba Pilato bua kuangata tshitalu tshia Yesu; Pilato wakitabuja. Nunku yeye wakalua, wakangata tshitalu tshiandi. Nikodemo, nguakalua kudi Yesu butuku diambedi, wakalua ne mula ne alo bisangisha, biakadi ne bujitu bua kilogama bu makumi anayi. Bakangata tshitalu tshia Yesu, bakatshinyengela ne bintu ebi bia mupuya muimpe mu bilulu bia line, bu mudi tshilele tshia Bena Yuda pa kujikabo bantu. Kuakashipelabo Yesu kuakadi muaba wa mitshi ya mamuma; mu muaba awu muakadi lukita lupia-lupia, muakadi tshitalu katshiyi tshianze kujikibuamu diambedi. Bualu bua Dilongolola dia Bena Yuda, ne bua lukita luakadi pa buipi, bakaladikamu Yesu (Yone 19:38-42).

Yosefe wa ku Alimataya, wakadi mulumbuludi wa butumbi, wakaya kudi Pilato ne dikima mu mutshima kudi Pilato ne wakalomba bua tshitalu tshia Yesu. Pakamanyisha kapitene wa masalayi lukama Pilato ne, Yesu udi mufue, Pilato wakafila tshitalu tshia Yesu kudi Yosefe (Mako 15:43). Nikodemowakalua bua kukuatshisha Yosefe bua kuladika tshitalu tshia Yesu mu lukita lupia-lupia lua Yosefe. Nikodemo wakadi Mufalese ne mulopo wa Bena Yuda. Yeye wakadi muyishi wa butumbi mu Isalele (Yone 3:1,10).

Kubika kua Yesu ku lufu

Dituku dia kumudilu dia lumingu, Malia wa ku Magadala wakalua ku lukita patshiatshia, butuku kabuyi buanze kutshia, wakamona dibue dimana kumusha ku lukita. Wakanyema lubilu, wakaya kudi Simona Petelo ne kudi muyidi mukuabo wakadi musuibue kudi Yesu, wakabambila ne, Bakumusha Mukelenge mu lukita, katueni bamanye kuakumuladikabo. Petelo wakalupuka ne muyidi awu, bua kuyabo ku lukita. Bubidi buabo bakaya lubilu, kadi muyidi mukuabo wakupita Petelo lubilu, wakafika ku lukita diambedi; wakinangila, wakatangilamu, wakamona bilulu bia line panshi, kadi yeye kakabuelamu. Simona Petelo wakalua umulonda kunyima, wakabuela mu lukita, wakamona bilulu bia line panshi, kadi tshitambala tshiakadi ku mutu kua Yesu katshiakadi pa bilulu bia line, tshiakadi tshivunga pa buatshi (Yone 20:1-8).

Malia wa ku Magadala wakadi muyidi wa Yesu wa kumpala bua kumona dibue dimana kumusha ku lukita. Yeye wakalua patshiatshia, butuku kabuyi buanze kutshia. Kakatshina butuku anyi masalayi akadi alama lukita. Pakafikeye, masalayi akamana kupingana kudi bamfumu abo (Tangila Matayo 27:62-66. 28:11-15). Malia wakaya lubilu bua kumanyisha Petelo ne muyidi mukuabo ne, “Bakumusha Mukelenge mu lukita”. (Muyidi mukuabo wakadi Yone, mu Lumu Luimpe luandi, udi udibikila ne, “Muyidi musuibue kudi Yesu” (Yone 20:2).

Petelo ne Yone wakatangila mu lukitu, bakamona bilulu bia line ne tshitambala tshiakadi tshivunga pa buatshi, pashishe bakapingana kudi nzubu wabo. Malia wa Magadala, wakadi nabo kadi bualu bua dinanga diende bua Mukelenge wende, wakashala ! Yesu wakadi mubika kunyima kua matuku asatu bu muakambeye.

Yesu udi umueneka kudi Malia wa ku Magadala

Malia wakadi muimane ku lukita udila; pakadiye udila nunku, wakinangila, wakatangila mu lukita; wakamona banjelo babidi bashikame baluate bilulu bitoke too,

munga ku mutu, mukuabo ku makasa, pakadi tshitalu tshia Yesu tshiladika. Bakamukonka ne, Mukaji, udi udidila tshinyi ? Yeye wakabambila ne, Bua bakuya ne Mukelenge wanyi, tshiena mumanye kuakumuladikabo. Pakambeye nunku, wakatshinguluka, wakamona Yesu muimane, kakamumanya ne, Yesu. Yesu wakamukonka ne, Mukaji, udi udidila tshinyi ? Udi ukeba nganyi ? Wakela meji ne, Muena mudimu wa mu muaba awu, wakamuambila ne, Mukelenge, biwikala mumumushe kunoko, ungambile kuwakumuladika, nemuangate. Yesu wakamba ne, Malia. Pakatshingulukeye, wakamuambila mu Buena Yuda ne, Laboni, kukudimuna kua muaku ne, Muyishi. Yesu wakamuambila ne, Kundengi tshianza, bualu bua tshiena muanze kuya kulu kudi Tatu; ya kudi bana betu, ubambile ne, Ndi nya kulu kudi Tatu wanyi ne Tatu wenu, kudi Nzambi wanyi ne Nzambi wenu. Malia wa ku Magadala wakalua, wakambila bayidi ne, Nakumona Mukelenge, yeye wakungambila malu aa (Yone 20:11-18).

Malia wakatangila mu lukita ne wakamona banjelo babidi bashikame baluate bilulu bitoke too kadi yeye kena utshina nansha. Pakatshingulukeye, wakatangila Yesu kadi kakamumanye, kadi pakumvueye Yesu wamba ne, Malia, yeye wakamanya diyi diandi. Mikoko yandi idi mimanye diyi diandi. (Yone 10:4).

Mukelenge wakambila Malia ne, “Kundengi tshianza bualu bua tshiena muanze kuya kulu kudi Tatu; ya kudi bana betu, ubambile ne, Ndi nya kulu kudi Tatu wanyi ne Tatu wenu, kudi Nzambi wanyi ne Nzambi wenu”. Malia kakamanya ne, Mukelenge Yesu wakadi pabuipe bua kumushiya ne kupingana mu diulu. Yesu udi ubikila bayidi bende ne, “Bana betu” bua musangu wa kumudilu. Bu Malia, nebamanye Mukelenge mu mushindu mukuabo padiye mu diulu. Mukanda wa Nzambi udi wamba ne, “Bualu bua yeye udi ujidila ne ne bobo badi bajidibua kabidi, bonso badi ba Tatu umue, bua bualu ebu kena ufua bundu bua kubabikila ne, Bana betu, wamba ne, Nengambile bana betu dina diebe, munkatshi mua bena ekeleziya nengimbe misambu ya kukutumbisha nayi” (Ebelu 2:11,12).

Pakalua Nyuma Muimpe pa dituku dia Pentekoste, malu makulukulu akalua mapia-mapia. Mukelenge Yesu wakadi mu diulu, Nyuma Muimpe wakadi pa buloba.

Yesu udi umueneka kudi bayidi bende, Toma kayiku

Dituku adi dia kumudilu dia lumingu, diba dimane kubuela, bayidi bakadi mu nzubu ne bibi binshila bualu bua bakatshina Bena Yuda, Yesu wakalua, wakimana munkatshi muabo, wakabambila ne, Ditalala dikale kunudi. Pakambeye diyi edi, wakabaleja bianza biandi ne lubadi luandi. Mitshima ya bayidi yakasanka, pakatangilabo Mukelenge (Yone 20:19,20).

Nansha bibi bia nzubu bikadi binshila, Yesu wakamueneka mukatshi mua bayidi bandi kadi Toma kakadi nabo. Meyi a Yesu kudibo akadi meyi mimpe, meyi bua kotalaja mitshima yabo ne, “Ditalala dikale kunudi”. Mitshima ya bayidi yakadi ne disanka pakatangilabo Mukelenge wabo. Bantu ba Nzambi nebatangile Yesu bu mudiye, nebikale nandi, bafuanangana nandi mu ditalala dia tshishiki (Tangila 1 Yone 3:2).

Yesu udi umueneka kudi bayidi, Toma udiku

Kadi Toma, mukuabo wa bayidi dikumi ne babidi, dina diandi dikuabo ne, Didumo, kakadi nabo, pakalua Yesu. Bayidi bakuabo bakamuambila ne, Tuakumona Mukelenge. Kadi yeye wakabambila ne, Bingikala tshiyi ntangila bibangu bia milonda bidi mu bianza biandi, tshiyi mbueja munu mu bibangu bia milonda, tshiyi mbueja tshianza mu lubadi, tshiena ngitabuja. Pakapita matuku muanda mukulu kabidi, bayidi bandi bakadi mu nzubu, Toma wakadi nabo. Bibi biakadi binshila, Yesu wakalua, wakimana munkatshi

muabo, wakamba ne, Ditalala dikale kunudi. Yeye wakambila Toma ne, Tuma munu webe kunoko, umone bianza bianyi; tuma tshianza tshiebe, utshibueje mu lubadi luanyi; kuikadi ne mpata, witabuje. Toma wakamuandamuna ne, Mukelenge wanyi ne Nzambi wanyi. Yesu wakamuambila ne, Bualu bua wewe wakuntangila, wakuitabuja; bakungitabuja, kabayi banze kuntangila, badi ne disanka (Yone 20:24-29).

Bidi bimueneka ne, Mukelenge Yesu wakadi mulue mu luse ne dinanga nangananga bua kumonangana ne Toma. Patuela meji bua mapanga etu ne luse lua Mukelenge Yesu kutudi tudi mua kuamba ne Toma ne, “Mukelenge wanyi ne Nzambi wanyi”. Mukelenge, udiundishe *ditabuja dietu* (Luka 17:5).

Toma udi tshifuanyikiji tshia difuka dia Bena Isalele mu dituku dilualua. Nzambi wakamba ne, “Nengitshikishile ba mu tshiota tshia Davidi ne ba mu Yelushalema nyuma wa luse ne wa kutendekena; nebamumone wakutuabo difuma; nebamuashile muadi bu mudi muntu washila muanandi umuepele muadi, nebamudile ne kanyinganyinga kakole” (Zekaya 12:10).

***“Yesu wakenza bimanyinu bikuabo bia bungi ku mesu
kua bayidi, bidi kabiya bifundibue mu mukanda ewu; kadi
malu aa adi mafundibue bua nuenu nuitabuje ne,
Yesu udi Kilisto, Muana wa Nzambi; ne bua nuenu nuikale
ne muoyo mu dina diende, panuitabuja”
(Yone 20:30-31).***